



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :

f Tir Yimyim

Instagram tiryimyim@aolima

YouTube tir yimyim

TAPAK 8

UP nung Yogi-i aniba sorkari nungja dang melener

Novel Prize agizuki aotsu Maria Ressa nem temelaba agutsu

VOL. XIX NO. 57 (ADOK 57) DIMAPUR

KÜPTOKNÜ (SATURDAY)

LUCHII (DECEMBER) 04, 2021

₹ 5.00

Advisor Phukavi-i eDaakhil portal lapoktsü



Dimapur, December 3, 2021 (TYO): December 2, 2021 nü NIC Nagaland State Centre Video Conference Hall nung Nagaland atema eDaakhil portal lapoktsüogo.

Food and Civil Supplies, Legal Metrology & Consumer Protection Department Advisor Phukayi Sumi-i eDaakhil portal lapoktsü.

"Consumer Centric Service-i yangluba atema Nagaland sorkar tenung nung NIC dang pelar aser ano iba portal lapokba sentong nung adentsü atema NIC Delhi telok aruba atema pelar" ta Advisor Phukayi-i ashi.

"India ya linük tulu ka lir aser shishilembartemi consumer tem dang nungi tim masüba tajangzük agir. Anungji India sensotem aser consumer ajak kümzüka ayutsü

nüngdaker. India Prime Minister, Narendra Modi lenisüba kübok sorkari iba mapatenzükba atema kanga pelar" ta paisa metetdaksü.

Nagaland nung Consumer Affairs Department ajanga mapa inyakba osang ajak lemsateptsü, ta Pukhavi-isa ashi.

Iba sentong nung Nagaland Voluntary Consumers' Organisation President Kezhokhoto Savi, Advocate aser Manager, Nagaland State Consumer Helpline-i State Consumer Affairs aser Consumer rights indang osang tatsü agi lemsatet.

Nagaland state sorkari nübortem ajangzüksü atema tekaratiba nung Consumer Protection Act 2019 mapa kuma inyaksü mepishir, ta Kezhokhoto Savi-isa ashi.

Tseminyu district takhangba ulushitsü

Dimapur, December 3, 2021 (TYO): Rengma nungeri Tseminyu District akümtsü takhangba agütsüba atema state sorkari lemtet kecha magir anungji parnok lungkak aitba tanabuba shilemji 'sit-in dharna' agütsü aser iba sülen 'hunger strike' alitsü ta metetdaksüogo.

Iba lemtet ya November 29, 2021 nü Rengma Hoho-i trokbuba Executive Body senden amendang agiba lir, ta Rengma Hoho President Pollem Tep aser General Secretary Sinhilo Thongseb nati sangdong ka nung

ashi. Iba senden nung Rengma Students' Union (RSU), Rengma Selo Zi (RSZ), Rengma Mothers' Association (RMA), Rengma Officers' Forum (ROF), Rengma Gaon Bura Federation (RBF), Rengma Public Organisation Kohima (RPOK), Rengma Public Organisation Dimapur (RPOD), Rengma Public Organisation Chumukedima (RPOC), Rengma Village Council Chairmans Forum (RVCCF) aser tzükong tenet nungi teloktem aden ta Rengma Hoho-isa metetdaksü.

Kisama nung nisung tajemba adenshiogo

Kohima, December 3, 2021 (TYO): Naga Heritage village Kisama nung 22 buba Hornbill Festival tasemnübuba amongdang nisung kanga tajemba adenshia mongogo.

Hornbill Festival tenzükba anogo nung nisung 12,000 tema adenshia liasü saka tananü nisung 7,191 aser tasemnü nisung 5,515 dang adenshi.

"Hokolbarnü arurtemji locals 4,253, domestic tourists 1,252 aser bendanger 10 liasü" ta Tourism Department Assistant Director, Toka E. Tuccumi-i ashi.

Hornbill Festival anogo asemnü tashi nung nisung 25,126 adenshiogo aser parnokji locals 17,001, domestic tourists 2,090 aser foreigners 35 liasü.

Konyak nungeri alemli tekolak atangba tsüngsang sayu

Kohima, December 3, 2021 (TYO): Naga nungeri ya alemli tekolak bushiba indang tsüngsang ka tanü Hornbill Festival nung Konyak Naga nungeri sayudang tereprangertem kanga puago.

Naga Heritage Village Kisama nung Hornbill Festival anogo tasembuba nung parnokiba tsüngsang sayu.

Iba tsüngsang dang "Yah Lahpu" ta ajar aser Konyak kin tenung nung Longchang Cultural Troupe ajanga tsüngsanga sayu.

Kisama indang main arena nung muzzle-loading prangpong khatokba aser mokozü adokba ngua tesentepertemi asatapa

pelatet.

Tanü morning session nung tetushi süa jaokerji General Commanding officer of 4 Corps, Tezpur, Lt. Gen. Ravin Khosla liasü aser Public Health Engineering Minister Jacob Zhimomi aser Sericulture Excise and Minority Affairs Advisor Zhaleo Rio nati host ama shilem agi.

Iba sentong nung Zeliang - Charing Lin, Kuki - Suhta Cam, Yimkhiung - Wochak Khintam, Sumi - Apilo Kuwo, Sangtam - Throngrü Nyichi khi, Rengma - Loshü Khwe), Kachari - Chotrolee folk dance, Pochury - Tenon Pasu, Chakhesang - Tukhuhe

shilemtem agi.

Hokolbar afternoon session nung Ao - Naga Wadir Yar (Naga Wadir's Dance), Phom - Kyong-Nya-Yong (Graceful dance), Lotha - Rice bounding folk song, Khiamniungan - Po-Hoi Jihang (Dormitory song), Garo - Quarrel dance and Chang - Khüngkhün Wansatyung (traditional way of fire making) shilemtem agia liasü.

Iba sentong nung host temji Planning and Coordination, Land Revenue Minister Neiba Kronu aser Skill Development, Labour and Employment & CAWD Advisor Kazheto Kinimi na liasü.

COVID-19 Nagaland: 2 dak putet, 7 anep & 1 asü

Kohima, December 3, 2021 (TYO): Nagaland nung Hokolbarnü nisung ana dak COVID-19 putet aser nisung ka asü.

"Tanü Kohima aser Tuensang nung nisung kaka dak COVID-19 putet" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Taoba ghonda 24 tsüngda nisung 7 tashi taneptsü angu. Parnokji Dimapur nung 5 aser Mokokchung o Wokha nung kaka (1) lir. Parnok züngsema

taneptsü angur ajak agi nisung 30,245 kümogo" ta paisa ashi.

Tang nisung 122 anepaludar saka parnok 97 dakbo shirangba yimya kecha mali, ta Dr. Kikon-isa shisem.

Hokolbarnü Dimapur nung COVID-19 puteta alir ka asüba züngsema tasür ajak agi 699 kümogo.

"Brihostibar tashi nung nisung 741,690 nem COVID-19 vaccine indang dose 12,93,315 agütsüogo" ta State Immunization Officer, Dr Ritu Thurr-i ashi.

"Vaccine agirtemji frontline workers 60,980, healthcare workers 15,999, arishi küm 45 ser temapur 209,830 aser arishi küm 18 nungi 44 tsüngda alir 454,881 lir" ta paisa metetdaksü.

"Vaccine agirtem rongnungi nisung 551,625-i dose anaprong agiogo. Parnokji frontline workers 48,534, healthcare workers 13,515, arishi küm 45 ser temapur 173,650 aser arishi küm 18 nungi 44 tsüngda alir 315,926 lir" ta Dr Thurr-isa ashi.

Governor-i asür Rfn N Khatnei kinungtsü nem teyari agütsü

Dimapur, December 3, 2021 (Agencies): November 13 nü Manipur nung 46th Assam Rifles convoy amakdang asür Rfn N Khatnei Konyak'er kibong nem Nagaland Governor Jagdish Mukhi-i senotsü teyari agütsüogo.

Hokolbarnü Mon Deputy Commissioner Thavaseelan K-i Governor Jagdish Mukhi tenung nung asür Khatnei

kinungtsü nem Rs 3,00,000 cheque agütsü.

"Rfn N Khatnei Konyak-i linük tenzük aser linük atema taküm bendanga agütsü. Pa ama tasütait sepai ka alibaji linük atema konang lir" ta taoba mapang Governor Mukhi-i shia liasü.

"Ni iba mapa khukhua aitsür. Assam Rifles sepaitem den tetsür aser tanur dena

tepsetba ya ajaki aitsütsüla" ta paisa ashi.

"Yimjung meimba senso shiai linük nung aser talisa North East India nung tensa tajung akümtsü inyakba mapang ka nung, iba ama mapa tamajung inyakerkem alidak mali aser tekaratiba nung ozüng tapet agi merenshitsüla" ta Governor Mukhi-isa metetdaksüogo.

Congress MP Bordoloi-i Northeast atema 'time zone' balaka meshir

Guwahati, December 3, 2021 (Agencies): Congress MP Pradyut Bordoloi-i Parliament nung Northeast atema 'time zone' balaka meshiogo.

Hokolbar Lok Sabha nung MP Bordoloi-i Private Member Bill benok aser iba ya linük nung ketdangsubaren tajungba akümtsü atema Time Zone ana kuma lemdangtsüba indang lir.

"Northeast nung anü tekaraba adoker aser iba jagi IST mapang sülen anidakdang

ghonda ana akoksar. Tanü ni Lok Sabha nung Time Zone balala ana akümtsü atema Private Member Bill ka benokogo" ta Bordoloi-i metetdaksü.

2017 küm Bengaluru nung amenoka aliba National Institute of Advanced Studies ajanga ashiba ajanga Northeast nem time zone balaka agütsüba ajanga küm shia electricity indang 2.7 billion units kümzüksü ta bushiteta lir.

Northeast nung anepdang 4:00

ako meta anü adoker aser nikongdang 5:00 ako meta ammanager.

Anungji, nisungtem mapa inyak tenzükdangbo anogo tom ka süiadoker alir aser iba ajanga anü irr külana light atsükba ajanga electricity talia amshir ta National Institute of Advanced Studies-i bushitet.

Anungji Northeast nem time zone balaka agütsüba ajanga nisungtemi daylight hours tajungba amshitettsü, ta parnokisa ashi.

Chungtia yimdak tetsürtem jenjang ajungkettsü atema mapatong ka tenzükogo



R.R Okhandiar IFS, Member Secretary, CSB, Ministry of Textile, Gol-i Chungtia yimdak tetsürtem jenjang ajungkettsü atema yangluba Multi Purpose Common Facility Centre ka lapoktsüdang tangokba noksa nung angur. Chungtia, 3rd December, 2021.

Chungtia yim, 3rd Nov (TYO): Chungtia yimdak Eri-Silk Development Project kübok Multi Purpose Common Facility Centre (MPFC) ta sür tetsürtem jenjang ajungkettsü atema yangluba ki tulu ka Dr. K.M Vijaya Kumari, Director CMER & IT, CSB, Lahdoigarh Jorhat densema R.R Okhandiar IFS, Member Secretary, CSB, Ministry of Textile, Govt. of India ajanga meraketa lapoktsüogo.

Iba mapatong (project) ya North Eastern Region Textile Promotion Scheme, Central Silk Board (CSB), Ministry of Textile Govt. of India kübok yangluba ka lir aser iba mapatong ya Chungtia Village Council-i achayanga inyaker. Tanü iba ki (MPCFC) Longtsüktep Baptist Church Chungtia, Pastor Pursowa-i meshiteta sarasademtsü.

Tanü lapokba Multi Purpose Common Facility Centre kidang

ya kol balala amenoktsü aser sütakmentak/olangla maparen balala inyaktü aser yangi tetsür 150 shi mapa inyaktü maongka angutsü, ta Eri-Silk Development Project (Chungtia) Secretary, Lanusüngzük Longchar-i osangbenertem den jembidang metetdaksü.

Iba project ya taoba 2019 küm Union Minister Smriti Irani Chungtia-i aruba mapang ka, Chungtia Village Council-i par yimdak iba project tenzüktsü tezüluba ka agütsü, tia junga ministerlai iba project-ji agizüka inyakba tanü mapa ka tembanger aser ano kasa mapatong kübok training balala agidak riju ka yangludar aser mapa inyakerkem anisüngzükdak ki ka yanglutsü lir, ta paisa metetdaksü.

Tanü tongti tesemdang, R.R Okhandiar IFS-i mapang tatsüka jembidang, iba mapatong takok inyakba ngua

kanga pelar, ta ashi. Iba mapatong dak sentakba nung nungdakbatem reprangteptsü mulunga lir, anungji, teinyaktü (DPR) nung shia aliba ama mapa ajak kanga junga inyakdaksünür, ta paisa mepishia metetdaksü.

Iba centre ya nungdakba (raw material) peria adokba tesem ka asütsüsa merangtsüla aser yangi iba centre amenokba ajanga nüburtem lenmang aisü nung tajangzük angutsü imlar, ta paisa shisem.

Iba sentong nung Mokokchung ADC Shashank Pratap IAS, Director CMER & IT, CSB, Lahdoigarh Jorhat - Dr. K.M Vijaya Kumari, Joint Director Sericulture (GoN) - Yashimeren, Village Council Chairman - M Yanger, Nodal Officer cum Consultant Eri-Silk Development Project, Chungtia - Imotemjen parnokkia tepela o den tayongzükba o balala jembia liasü.

Hornbill Festival tenzükur asemnü buba nung sobaliba balala sayu



Kisama nung tasemnübuba Hornbill Festival 2021 sentong agiba mapang Chang cultural troupe-i 'Khüngkhün Wansatyung' sayuba noksa nung angur.

Dimapur, Luchii/Dec. 03 (TYO): Kisama nung Hornbill benjongmung tenzükur asemnü buba, December 3, 2021 anepdang session nung Lt. Gen. RavinKhosla AVSM, SM, VSM, General Commanding officer, 4 Corps, Tezpur ya tetushi tesemdang liasü aser Minister, Public Health Engineering, Jacob Zhimomi aser Advisor, Sericulture, Excise

and Minority Affairs, Zhaleo Rio na tayonger liasü.

Iba sentong nung Zeliang Cultural Troupe (Charing Lin), Kuki (Suhta Cam), Yimkhiung Cultural Troupe (Wochak Khintam), Sumi Cultural Troupe (Apilo Kuwo), Sangtam Cultural Troupe (Sangtamthrongrü Nyichikhi), Rengma Cultural Troupe (Loshü Khwe), Kachari Cultural Troupe (Chotrolee folk

dance), Pochury cultural troupe (Tenon Pasu), Chakesang cultural troupe (Tukhuhe) nungertemi tebour tajung sobaliba tsüingsang aser ken agi shilem agia liasü. Nikongdang session nung Ao Cultural troupe ajanga Naga Wadir Yar (Naga Wadir tsüingsang), Phom cultural troupe ajanga Kyong-Nya-Yong (Graceful tsüingsang), Konyak cultural troupe Yah Lahpu (Head hunting), Lotha cultural troupe ajanga tsük asendang atenba ken aten, Khamniungan cultural troupe ajanga Po-Hoi Jihang (tsüki ken), Garo cultural troupe ajanga raraba tsüingsang aser Chang cultural troupe ajanga Khüngkhünwansatyung (akhi yimya nung mi apoba) sayua liasü. Nikongdang sentong nung tayonger ya Minister, Planning and Coordination, Land Revenue, Neiba Kronu aser Advisor, Skill Development, Labour and Employment, CAWD, Kazheto Kinimi na liasü.

Kohima nung Dec. 5 & 8 atema traffic özüng metetdaksü

Dimapur, Luchii/Dec. 03 (TYO): Kohima nung PHQ Junction nungi Phoolbari Junction tashi nung December 5, 2021 anepdang 7:00 ako nungi tenzük Hornbill Indigenous Go Cart Racing sentong agitsü renema aliba mechi nüburtem dang danga lenmang nung jajatsü asoshi Deputy Commissioner, Kohima, Gregory Thejawelie, NCS ajanga sangdong ka nung ashi.

Iba anogo PHQ Junction nungi Phoolbari Junction tsüingta anepdang 7:00 ako nungi 8:00 ako tashi gari kata mesenzütsü, ta ashi.

Ano December 8, 2021 nü Kohima nung anepdang 8:00 ako nungi tenzük Indira Gandhi

Stadium nungi KMC Tata Parking area tsütsü orr arua Indira Gandhi Stadium nung tembangtsü aliba Hornbill Cross Country Championship mechi Deputy Commissioner, Kohima ajanga nüburtem dang 'High Court Junction - NBCC Convention Hall - Sanuoru Bridge' lenmang nung jajatsü ajungshi.

IG Stadium nungi KMC Tata Parking area tashi lenmang ya anepdang 7:00 ako nungi nikongdang 1:00 ako tashi shibangtsü, ta sangdong ajanga ashi. Shia aliba lenmang nung gari anena alibatem anepdang 6:00 ako tashinung agentsü metetdaksür, ta sangdong ajanga ashi.

Dimapur Ao Lanur Telongjem ajanga tenüngsang agütsü

Dimapur, Luchii/Dec. 03 (TYO): Nagaland Information Commission nung Chief Information Commissioner shimba atema Dimapur Ao Lanur Telongjem ajanga I.Meyionen Jamir, IGP & Director (Rtd) Nagaland Lokayukta Police nem tenüngsang agütsü, ta DALT sangdong ka ajanga ashi.

Asen lenir dak tamang katetba atema Nagalad Governor Prof Jagdish Mukhi danga pelaba lemsateper.

I. Meyionen Jamir ya

nendaka inyakba bureaucrat rongnung ka liasü, shiba Kohima Ao Officers Telongjem nunga tir inyaka liasü. CIC ama pai Nagaland temaba jenjang nung ochishia osangtsüsang shidak prokshia aniang, ta onoki sarasademtsür. Kasa mapang nüburtemi pa dak tamang katettsüsa mapa shidak inyaktü aser asen Naga nunger ajungtsü atema amalitep aser tesendaktep tajung alitsü yongya atar, ta DALT sangdong ajangasa ashi.

Dimapur Watsü ketdangpurtem tasen shim

Dimapur, December 03 (TYO) : Dimapur Watsü Telongjem 37 buba lokti senden taoba ita November 27 nü Corner Stone College nung takok ngua agiogo.

Iba lokti senden nung Diphupar Ao Baptist Arogo nung sannüker Wb.N.Lipok Jamiri " Putu den Liromedema litetba tetsür," ta asüba onük nung jemi aser Wt. Renemsongla Ozükümi " Oshi Oben ya Kin ka Ayak," ta asüba onük nung jembia liasü.

Iba kasa lokti senden nung Dimapur Watsü Telongjem 2022 küm nungi 2024 tashi len ania aotsü atema Wt.Aoinla Jamir (Mongsenyimti), mendenbula ; Wt.Moala Longchar (Aonokpu), mendenbula yarila; tongti zülur Wt.Akangrenla (Süngratsü); repsem zülur Wt.Wangshikokla (Ungma), Senotsü ketdangser Wt. Wt.Merenlemla (Mongchen) aser kimen Wt. N.Sashila (Mopungchuket) nungertem shimogo.

ACAUT Nagaland ajanga asükhu lemsatep

Dimapur, Luchii/Dec. 03 (TYO): ACAUT Nagaland ajanga L. Subongwati Ao asüba atema asükhu lemsatep, shiba ACAUT Nagaland nung chairman tanabuba liasü.

ACAUT movement tenzükba mapang pai tongti shilem agia tangatetba tajung nung ajemalua aser jeret-pereta len ania liasü. Pa lenisüba kübok ACAUT indang mezüngbuba Public Rally ya October 31, 2013

nung ayongzükka liasü, ta ACAUT sangdong ka ajanga ashi.

Pa anojungi asüba ya Naga nunger asoshi takoksa tulu alitsü. Mangyimer kobong den ACAUT Nagaland ajanga asükhu lemsateper aser Tulusang Tsüngremi parnok nem anisüngzük agüjangma. Asür tanüla tesunep nung anisüngzükjang ta sarasademtsür, ta sangdong ajangasa ashi.

Governor-i Asür N. Khatnei Konyak kinungtsü nem senotsü teyari agütsü

Dimapur, Luchii/Dec. 03 (TYO): Nagaland Governor, Prof. Jagdish Mukhi tenüng nung Deputy Commissioner, Mon, Thavaseelan K, IAS ajanga Asür N. Khatnei Konyak kinungtsü nem sen lakh asem indang cheque ka agüja

liasü.

November 13, 2021 nü Sials Village, Churachandpur, Manipur nung telungpur temi atsüka atar 46 Assam Rifles indang convoy amakdang N. Khatnei Konyak densema nisung tenet asü.



Union Minister for Power, New and Renewable Energy Raj Kumar Singh-i North East state tem nungi Power Minister tem den Revamped Distribution Sector Scheme indang senden ka amendang agiba noksa angur. (Guwahati, December 3)

Assam Governor-i Dr Rajendra Prasad indang kürakyanglu sayaogo

Guwahati, December 3, 2021

(Agencies): Assam Governor Jagdish Mukhi-i Hokolbarnü Raj Bhavan, Guwahati nung India nung mezüngbuba President Dr. Rajendra Prasad indang kürak yanglu ka sayatsüogo

Dr. Rajendra Prasad sor küm 137 buba ajungba anogomung tenüng nung Jagdish Mukhi-i iba kürakyanglu sayatsü.

India nüjiso rara nung aser Indian Constitution latetba nung Dr. Rajendra Prasad-i shilem tulu agiba indang Assam Governor-i ashi.

Dr. Rajendra-i linük yangerba, ozüing metetba aser tangatetba tajungtem kodanga mamadoktsü ta paisa ashi.

Pa ya kanga dang ajemalu nisung ka liasü aser lanu putu akasodaktsür ka asütsü, ta paisa shisem.

"India talenba nung salatsüba atema nüjiso atema rarartem dang kanga pelar aser nüma atanger. Parnok rongnung Dr. Rajendra Prasad ya ka liasü" ta Governor Jagdish Mukhi-isa metetdaksü.

Sentong nung Chief Minister Himanta Biswa Sarma-ia o jembidang 2014 küm sülen sorkari nüjiso atema rarar ajak jangjatsü atema mapa inyaka arur ta ashi.

Raj Bhavan nung iba kürakyanglu ka yangluba ajanga iba nisung tali tejangja nung metettsü, ta paisa ashi.

Dr. Rajendra Prasad'er semchir Dr. Tara Sinha-ia tebou indang jembidang "pa ya sempet aika aliba nisung ka liasü" ta ashi.

Dr. Prasad ya India tenzüker tajung ka liasü aser pai linük atema taküm bendanga agüja inyaka, ta laisa ashi.

"Pai kibong den mapang balala meindok. Pa ya shisashir ka liasü aser ibaji pa indang kakettem ajanga kuli agütsür" ta Sinha-isa metetdaksü.

Governor-i tebou indang kürakyanglu yanglutsü mapa inyaka atema laisa tenüngsang agütsü.

Dr. Rajendra Prasad indang kürakyanglu ya sculptor Biren Singha-i chitetba lir.

Mizoram-i Omicron variant atema SOPs tasen agütsütsü

Aizawl, December 3, 2021

(Agencies): Covid-19 indang Omicron variant putetba ajanga Mizoram sorkari state nung SOPs tasen agütsütsü sentong renemogo.

Covid-19 management indang state-level expert team ajanga sorkar nem draft guidelines agütsüogo ta health ketdangsür kati ashi.

Brihostibarnü India nung mezüing atema nisung ana dak Omicron variant putet aser ibaji Karnataka nung lir.

South Africa nung doctor ka dak

iba virus putet. Tena ya bendangleni aoba osang kecha mali aser vaccine indang dose anaprong agiogo.

Omicron variant ya Delta variant dang nungi tezübaba menateper kechiyong iba dak mutations aser spike protein kanga aika lir, ta health ketdangsüri metetdaksü.

Brihostibarnü Mizoram nung nisung 275 dak COVID-19 putet aser parnok züingsema nisung ajak agi 1,35,450 kümogo.

Yashi nisung ka asüba ajanga tasür ajak agi nisung 501 kümogo.

Arunachal-i 3,000 MW tashi adokdaksütsü: Pema Khandu

Itanagar, December 3, 2021

(Agencies): Hydro Power Development Corporation of Arunachal Pradesh Ltd (HPDCAPL)-i 2030 tashi nung small aser mini hydro power projects ajanga 3,000 MW electricity adoktsü alizüing lir ta Arunachal Pradesh chief minister Pema Khandu-i ashi.

Tawang district kübok Zemithang yim nung Sumbachu Small Hydropower Project (3 MW) lapoktsüdang Chief minister Khandu-i iba osang ashi.

"Meta talang pilar alidak stand-alone hydropower projects ya lenmang tajungtiba lir" ta pai ashi.

"Zemithang nung alir nem Sumbachu 3MW SHP lapoktsüogo. Iba ya Hydro

Power Development Corporation of Arunachal Pradesh Limited ajanga yangluba lir" ta Pema Khandu-i ashi.

"Ni Hydro Power Department dang state ajungalen iba mesükba power generating stations yanglutsü atema survey agitsü tetuyuba agütsüogo. Onoki yim shia nem power supply nangzuka lir" ta paisa metetdaksü.

Brihostibarnü chief minister Khandu-isa Zemithang nung Gorzam Chorten indang museum-cum-library lapoktsü.

"Iba museum nung Buddhist artifacts aser manuscripts aika lir. Iba ajanga Buddhist sobaliba wazüka ayutsü aser ajungkettsü" ta CM Khandu-i ashi.



Hokolbarnü Tripura police-i Kalai slum tesem nung cannabis süngdong 10,000 shi raksaa endokba noksa nung angur. Iba indang jenjang ya Rs 10 lakh shi asütsü ta asadangtetogo. (Agartala, December 3)



22nd EDITION
Hornbill FESTIVAL 2021

Day 4
4th December

10:00 am
GUEST OF HONOUR
LT. GEN PC NAIR
AVSM, YSM
Director General,
Assam Rifles, Shillong.

HOST
MR. V. KASHIHO SANGTAM
Minister,
Soil and Water Conservation.

MR. MHATHUNG YANTHAN
Advisor,
Horticulture.

1:00 pm
GUEST OF HONOUR
MR. DANIEL SIM
Deputy Consul General,
Australia.

HOST
MR. TONGPANG OZUKUM
Minister,
Housing & Mechanical.

MR. K. TOKUGHA SUKHALU
Advisor,
School Education.

10:00 am - 12:00 noon & 01:00 pm - 02:30 pm: CULTURAL SHOW (Kisama Main Arena)
09:30 am - 04:00 pm: CITY TOUR (Kisama to Kohima)
06:00 am: DZUKOU EXPERIENCE (Kisama to Dzukou)
10:00 am - 04:00 pm: TOUPHEMA EXPERIENCE (ToupHEMA)
10:00 am - 04:00 pm: PFUTSERO EXPERIENCE (Pfutsero)
07:00 am - 04:00 pm: HORNBILL WALKS (Phusachadu, Kigwema and Kohima 2nd WW Walk and Kohima)
10:00 pm - 04:00 pm: HORNBILL NAGA WRESTLING (Amphi Theatre Kisama)
10:00 am - 05:00 pm: 1st HORNBILL CANOE SPRINT/ BOAT RACE (Tsuza Eryu, Doyang)
10:00 am - 05:00 pm: THIRD NAGALAND FILM FESTIVAL Hornbill Edition (Capital Convention Centre)
10:00 am - 05:00 pm: HANDLOOM & HANDICRAFTS (Bamboo Pavilion, Kisama)
10:00 pm - 04:00 pm: MYKI FESTIVAL (Kisama)
12:00 noon-01:00 pm: TRADITIONAL SHOT PUT (Kisama Main Arena)
10:00 pm - 04:00 pm: NAGA CHEF SEASON 8 (Kisama)
10:00 am - 05:00 pm: CRAFTSCAPE (Outside Museum, Kisama)
10:00 am - 05:00 pm: LIVE DEMONSTRATION OF VARIOUS CULTURAL ITEMS (Kohima Village)
10:00 am - 05:00 pm: ARTIST CORNER (Kisama)
10:00 am - 05:00 pm: Naga Indigenous Event (ToupHEMA)
04:00 pm: HORNBILL 9th HRM RIDERS UNLOCK (Chuna and Kheciegei)
10:00 am - 05:00 pm: ARCHIVES SECTION & WW 2 MUSEUM (Kisama)
10:00 am - 05:00 pm: HORTISCAPE (Kisama)
04:00 pm: SALE OF AGRI PRODUCTS (Kisama)
10:00 am - 05:00 pm: ADVENTURE ACTIVITIES (Childrens Park, Kisama)
10:00 am - 08:00 pm: ART EXHIBITION - CUM - SALE (World War II Museum, Kisama)
10:00 am - 05:00 pm: KIDS CARNIVAL (Childrens Park, Kisama)
10:30 am - 04:00 pm: HORNBILL INTERNATIONAL PHOTO FEST (Outside Museum, Kisama)
08:00 am - 07:00 pm: KHEZHAKENO PEOPLES FESTIVAL (Khezhakeno, Phek)
06:00 pm: Music Festival X.O.TIC/ TFC/ NAGALAND COLLECTIVE (Main Arena Kisama)
10:00 am - 03:00 pm: Nagaland LITERATURE FEST (RCEMPA, Jotsoma)
10:00 am - 05:00 pm: HORNBILL FUTSAL (Kakit & Sovima, Dimapur)
12:00 Noon - 08:00 pm: Bamboo Carnival (NBDA Dimapur)
04:00 pm - 08:00 pm: TRADITIONAL EVENING PARK (Kigwema)
06:00 pm - 09:00 pm: NIGHT CARNIVAL - 1, NIGHT CARNIVAL - 2, NIGHT CARNIVAL - 3,
NIGHT CARNIVAL - 4 (Kohima Town, BOC Junction, High School Jn. & Kohima Local Ground)
03:00 pm onwards: Pop-up & Concerts by imagi Nation (RCEMPA, Jotsoma)



CENTRAL COUNCIL FOR RESEARCH IN AYURVEDIC SCIENCES
Ministry of AYUSH, Government of India
J.L.N.B.C.E.H. Anusadhan Bhawan
No. 61-65, Institutional Area, Opp. "D" Block, Janakpuri, New Delhi - 110058
Email: dg-ccras@nic.in, Website: www.ccras.nic.in
Tel: 011-28525852, Fax: 28520748

ADVERTISEMENT - 2021
PANCHKARMA TECHNICIAN COURSE

Central Council for Research in Ayurvedic Sciences (CCRAS), Ministry of AYUSH, Govt. of India ajanga küm ka, full time & self financed Panchakarma Technician Course atema tenüng meshir. Iba ya Healthcare Sector Skill Council (HSSC) - National Skills Development Corporation (NSDC) nung CCRAS, Ministry of AYUSH, Govt. of India, New Delhi ajanga agitsü.

Training Centre:
Central Ayurveda Research Institute (CARI)
Borsojai (Bhetapara), Beltola
Guwahati-781028, Assam
Ph. 0361-2303714, 2132180, E-mail: neiari-guwahati@gov.in

Mapang: Küm 1 (January, 2022 - December, 2022)
Menden ajak agi: 10 (nüngdakra teimba akümtsü), CARI, Guwahati, Assam (tetsür aser tebur shia atema 50%)
Eligibility: India ajungalen nungi 12th standard pass candidates.
Arishi küm tasazük: Training temer final assessment anogo nung küm 18 junger alitsüla.
Reservation: India sorkar indang temzung ajanga, reservation policy ji SC atema 15%, ST atema 7.5% aser OBC (Non Creamy Layer) atema 27%. PH (only lower locomotive disorders) atema Horizontal reservation 4% aser EWS category atema 10%.
Tenüng agütsütsü tatembang anogo: 24th December, 2021 matongdang.
Candidate Fee: Application Fee- Rs.500/- aser Course Fee- Total Rs. 30,000/- (in 3 instalments).
Application agütsüba yimya: Application nung nüngdakba ajak zülur aser Application Fee indang demand draft dennür registered mesüra speed post ajanga Institute dangi yoktsüla. Information Brochure (details of Training Programme & Submission Process), Syllabus aser Application Form download asütsü atema council indang website www.ccras.nic.in nung angutsü.
Anogo süir aruba applications magizüktsü.

Assistant Director (Coord.)
davp 17216/11/0011/2122



TIR YIMYIM

YIMOBILEM (EDITORIAL)

DIMAPUR

KÜPTOKNÜ

LUCHII 04, 2021

Asenok ajungshiteptsüba tesem kar

Asenok rongnung aiben meranga kaketshisatsü bushitsü, meranga mapa inyaksü, ochishia alitsü aser ozüng raksaba mapatem nungi pilaa alitsü ajungshiteper. Aji tim. Iba ama tantsü tambu aser lenirtemi nübortem ajungshiba agi, kar ka majung agibo, nisung aika tajung akümer. Iba ama ajungshitepba jagi kaketshir tashitemeteter aser mapa inyaketeter aika adokogo. Item jagi ozüng kübok senso tajung küma meranga inyaker aser ochishia alitsü meranger. Ibayongji, yashi tashi asenoki yanglutetba aser asenoki züsentetbatembo tayokdaka maka aser talir-a mali ta asenok yabo tangartemi yangluba alia agir aser tangartemi züsentetba alia chiyongertem dang süa aruogo, ajisüaka tanübo asenokia tagitsü nüngdak oset aika yanglutetter aser chiyongtsüa aika züsentetter. Aji oda, joko asenoki züsentetba süngo ajemer aser tangalenia tayoktsü yoker, asenoki züsentetba mersü, bengana aser ano sügjanglijang aika joko tanga lima nunga ayok tenzükogo. Ano külen asenoki yangluba ki osettem, nok, nü, azük, kioktsü, shilangtsü, süng aser long agi chitetba noksa aser olangla mapatem nungi adokba abensüoshi tapu aika alima nung nübortemi kanga sapua agiteper. Itemji dang masü saka asenoki inyaktetba mapatem rongnung, ano, tongtibang mapatemji kakets züluba, ken atenba aser jilushi aiba mapatem ajak ya asenok mulungjang aser kolok nungi adokba rongsentem lir. Itemji teinyakner ajaki inyaktetba mapatem masü saka asenok rongnunga Tsüngremi lemsütsüba sempet akartem aser meranga inyakba purtemi inyaktetter, anungji akok tashi asenoki parnokji ajungshitsüla. Ajisüaka, taoksatsüka aser tezüdangtsüka, asenoki aiben asen nisungi züsentetba chiyongtsü aser osettem alitsü ajungshiteptsü melen mayoktsüang ozüng latettsür. Yimya agi, chiyongtsü züsentetba aser kidang nüngdakba osettem yangluba mapatem ya yimtak yimtsüng nung alirtemi inyaker aser itemji town-tem nung bener oa ayoker. Anungji, itemji town nung alirtemi ali nung dang parnoka tajangzük angutsü aser ano temerangba aser tajungba inyaksü, Ajisüaka, asenok aikati mebilemdangi inyakba mapa kaji, yimtak yimtsüng nungi bener aruba chiyongtsü, süoshi aser osettemji alitsü ajungshiteptsü melen, itemji ki sema yoka mejajatsü lokti aser yimteni ozüng agütsür. Iba amaji, asenok rongnung asen kija taküm aser kibonga kakets kisüng azüng nung melenshitsuasa kakets zülur tajung aika adoka lir, ajisüaka parnokji züluba kaketsitemji azüngtsü yongyaseta atar alia azüngtsü melen, asenoki meyiper item kaketsitemji asenok alidak ki sema yoka jajatsü memelar. Iba jagi asenok shisatsü agi anünger aser kakets zülur aika adoka kakets aika zülutsü melen kakets zülur maliba maliba akümer. Asenoki asenok alima nung aliba ya government ita sen chia, iba jagi ki tajung ka yanglur yangji lia anogo shia shi ango den chiyonga alitsü atema kisüng alir amai bilemer. Iba jagi kakets mazünger, television aser mobile phone nung tagitsü osangtsüsangbo merepranger, kakets ayokdak bushia kakets alii aotsüjibo pongmang. Item jagi asenok memetetba-memetetba akümer aser memetetba akümba agi tangar memenepba - memenepba akümer. Tanü asenok ajungshiteptsüba tesemtemji itemji lir. Asenoki asen adianutem dang onoki alidi, nenoki chiyongtsü züsentetang, nüngdak osettem yangluang, kakets zülurang, kensep adokang, jilushi iang ta ajungshitsüla. Tsüngremi temeim aser Pa sentong tsütsü atsünga züluba kaketsitem süra arogo nungertem rongnung item kaketsitemji bushia alia azüngtsü ajungshiteptsüla aser tenla kidanga arogo nungertem ajungshia metetdaksütsüla. Aji oda, yimten aser nisunger libaliro aser sobaliba tsütsü atsünga züluba kaketsitemjia nübortem rongnung lokti aser yimten lenirtemi ajungshitepa züngdaksütsüla. Kakets azüngba taküm aser mazüngba taküm, kakets azüngba kin aser mazüng kin na tetsüngdaji awashi, wainshin aser tashitemeteter nung am zükdoka aittsü. Aji oda, kakets zünger jembiba o mazüng jembiba na tetsüngdajia miima meyutetter. Iba kasaji asenoki asen nisungtemi atenba kentem jangrabangraa alia angatsüla aser jilushitema jangrabangraa repringtsüla. Item ajakji alima tajungba küma yanglushitsü atema tenzükdak tesemtem lir. Iba amaji, kodang asenoki asen nisungtemi züsentetba chiyongtsütem, yanglutetba ki oset aser süoshitem aser asen nisungi züluba kaketsitem aser asen nisungi atenba kenseptem ki tonga tonga bener arua ayoktsü aser asenokia bushia oa alitsü ajungshitepdir, iba jagi asenok rongsenren nunga talir dang masü saka tayokertema aika akümtsü aser shisa aneti tangar dangi aotsü melen tangar asenok dangi arutsü. Iba jagi asenok tashitemeteter aser takar kin, lokti aser kibong kümadoktsü. Iba jagi asen lima tereprangtsü nunga lasasa topur junga adoktsü aser yimten aser loktiliba nung tesünep alitsü. Iba ama lima ka yanglutsü asoshi maneni ajungshitepdi.

OLEMSABANG

Arogo aser takartemi Decoration nung sen aika meintoki, sensaker timtemer dangang temeim mapa inyaksüla aser nubur asoshi mapa tajung inyaksüla

L.Kika Pongener

Tanü asen Naga lima rongsenketzüng jenjang asadagra jenjang kangasa mejungi lir. Sorkar-a sentsüh (lialibilities) nung dang aor, kibongtem tia asadagra noklang nung shilem ter shi (10 %) taka-taiter (high class) asütsü akok, shilem metsü nungi semer shi (20-30 %) pei-bo peria tanu poksung alirtem (middle class) asütsü akok, aser tanungba shilem neter (70 %) jibo sensak tia (below poverty) nung alirtem asütsü. Talisa COVID-19 wara agi Lockdown asüba ajanga kibongtem aika sensak tiai idaktsüogo. Ano tanu asen Naga lima nung aliba loktiliba jenjang asadagra, lokti-tentet ajungaji sorkar dak aser kibongtem saru molok aser nubutsük dak tang metaloker aliba teimba lir. Nuburtem nem teyari/tajangzük agütsütsüsa rongsenketzüng jenjang junga aliba lokti-tentetbo kata malitsü sudi. Asenoki Assam-India lima nung aliba loktilibatem repringdangra, Co-operative Societies, Lion Club, Rotary Club etc. yamala nubur nem teyari agütsütettsüsa rongsenkettsüng jenjang junga aliba lokti-tentet aika dang lir. Itum mesukba lokti-tentettem yagi mozü ki, school aser lokti adenshidak tesem nung Waiting shed, Community Well, Community Toilet, Dustpin etc. yamala yanglutsür. Mapang shia Free Medical Camp lapoka sensaker mokokmeinertem yarir, narongjaker nem angashitsü atema tenarong nung enokba 'Machine' angadi agütsür, nükpoker akümtsüba jenjang nung alirtem nem angadi teyari agüja 'Operation' agidaktsür, tsüngtsük-longtsüker nem 'Wheel Chair' agüja yarir. Ano lenmang lemjem nung suisupongertem aser aeinlen jajartem tzüradang jemdaksütsü atema tajemtsü tzü (Drinking water reserver) yanglua toktsür. Iba mesukba ka Langpangkong Senso Telongjem Dimapur jubilee-mong nungdem nung Dimapur main town nunga yangluja lir. Iba ama mapa tajungji asen Naga lima nung tenteta aliba lokti-tentet ajaki ajizüktepa inyaksüla, talisa arogo temi nubur atema iba ama mapa tajung inyaksüla. Atangji, sorkar dak dang metaloker alitsüba mebilemi arogo aser tanga lokti-tentettem-ia iba ama mapa tajung inyaksü angazüktsüla. Ajisuaka, kanga tesasatsü-ka, asen lima nung tenteta aliba lokti-tentettembo ajunga nuburtem/kibongtem dang saru molok aser nubutsük dak dang metaloker aliba lokti-tentettem tang lir. Aji oda, asen lima nung tenteta aliba lokti-tentettem yagibo kibongtem-ang sensak tiai idaktsür, anungji kokrabangla nuburtem nem tajangzük magütsütetba lokti-tentettem yabo anena-adokba/mayuba tajungba asütsü. Atangji, tanu asen Naga lima taji sorkar nungi tenzük alua kibong tashi rongsenketzüng jenjang kangasa mejungi lir.

Ajisüaka, asenoki tanu asen Naga lima nung aliba arogo temi tia asadagra, yimtsüng tila nung arogo kar dak alaka arogo teimba ka rongsenketzüng jenjang tanga lokti-tentet dang nungibo kanga agi tajungba asütsü sudi. Aji oda, asen lima sensak tia nungi jenjang ajungketsü atema arogo temi dak dang teimla tera lir ama asadangteter. Anungji arogo-i temulongtetba tajung agi inyakdi ta sura, arogo temi kibong aser nubur dang yaritetsü lenmang sadem-sadema dang lir. Taoba mapang Ao Baptist Arogo Mungdang (ABAM)-i acha-ayanga arogo temi deobar anogo ka shiteta 'Foot Hill Road' nungdem nung temulongter tenla bendena sorkar nem tenla agütsüba-to asen lima terenlok atema arogo-i shilem tajung agiba mapa tajung ka asütsü. Atangji, iba mapa-to Naga nung kin ajak dang tatishitsü tajung sayuba otsü-sutsü mapa ka asütsü. Tanu arogo-i temulongtetba tajungtiba agi inyakdi sura, ibala mesuka asen lima terenlok mapa nung kibongtem dang nungi tenla mesaruyongjia, arogo senbong nungi percentage (%) tera-ra agiteter sorkar-i mayimjemba asen lima terenlok maparen kar nung danga yarisema inyaksü koka lir. Assam-India lima nung limapur Hindu nungertemi nubur atema 'Mission' mapa tulu inyakba asenoki angur. Tanga lima nung oda yutsür asen lima Dimapur jila nung 'Ram Khrisna Mission' ajanga hospital lapoker shirangertem angadi mesuka jenjang dalang agi yariba agi maka-maiter timtemer kibongtem aika anisungzükdaksür. Iba mesuka ano tanga 'Mission' mapa aika inyakba agi nuburtem nem tajangzük agütsüba 'Soceity' aika lir. Ajisuaka, kanga tesasatsü-ka tanu asenok Khrista-temibo limapurtemi inyakba-a menepa mapa tajung meinyakteti meyiper kibongtem-ang sensak tiai aitsüsa tapu-tapu purapujia saru-saji dang sarur aser tapu-tapu percentage kati-karaba zünger-mezüngma lir.

Tanü asen Naga lima nung 'Fashion' ka amai takar kibongtemi toktepa sen lakh junga endoka 'Christmas Decoration' yanglutetper. Hau, Christmas mongpo metettsü tongmelang (simple) agi Decoration kar enoker rongsen akartemibo Decoration nung senotsü aika endoktsü melena sensaker mokokmiener kibongtem, lajar, tantsü-tambur haji-hakok teyarir malir kibongtem kar nem-ang 'Relief' terara agütsüba-ang kanga agi tajungba masütsü no...??? Kechiyong asen lima nung nisung karbo temeimtsü-ka benjong mapang shi-ango jibo oda yutsür jang (Rice)-a dena talitsü senotsü maliba kibongtem aika lir. Talisa COVID-19 wara agi Lockdown sur aayanga kibong mesua aliba kibongtem aika sen aadak lenmang kecha mali kanga timtema alir aika kümogo. Kibongtem aika asükwa aben-suoshi talem 'Second Hand' kata alitsü makokba maka-maiter timtemer kibong aika lir. Tang ama Lockdown mapang nung küm tema arudang school tanurtem 'Fee' agütsü nungang 'Result' angutsüba, saka School Fee küpdangtsü makaba kibongtem aika lir. Anungji Decoration nung sen merijang aika endoka yanglutsü melenabo, item ama timtemer kibong kar danga yariba-ang tajungba masütsü no...??? Ano nujai dang masü arogo temi-ia Christmas mapang kiyong-kiyong (Colony/Sector) aser kima-yimdong (Main road) ajak nung sen merijang/lakh dak tali mendoka decoration tobur junga sentsüpranga toktepa enokteper. Hau-niii...alima nubur dang Christmas mongpo metetdakja decoration enokbaji mapa tajung lir, aser mapa tajung dang masü, Christmas osang alima dang sangoktsüba külisuba mapa ka lir. Aji oda, kima yimdong aser kilong nung Decoration tobur junga enokbajia kanga tongtipang mapa ka lir. Ajisuaka, Decoration-ji kanga jenjang tasak (luxurious) nung masü, saka tongmelang (Simple) nung enoker, akok ka asübo Christmas nungdem nung sensaker, mokokminer, timtemer, tantsü-tambur haji-hakok, lemta-mara/mata-mabensar nisungtem kar nem-ang teyari (Relief) agütsü nungang ibajiang temoatsü tuluba asütsü. Anungji takartem aser arogo-i kokrabang Decoration nung senotsü tali meintoki sensaker/timtemer dangang yaritsüba aser nubur asoshi mapa tajung kar danga inyaksü iba ocet ajanga ajungshir.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Yihuda nunger ya Tsüngremi shimtetba nüburtem ta aikati bilemer



2021 June ita nung Ethiopia nungi Yihuda nungertem Israel tonga aruba sülen tangokba noksa nung angur. Linük balala nungi Yihuda nungeri pei lima (Israel) bushia aruba shilem 31 agi timba kümogo.

December 03, 2021: US nung Evangelical Protestant Khristan shilem 51-ibo Yihuda nunger ya Tsüngremi shimtetba nüburtem lir ta bilemer, ta tawa sayaba survey ka ajanga metetdaksü.

"The Jewish Connection: Evangelicals and Israel," ta ajaba survey ya tan hopta Infinity Concepts-i sayaogo.

Iba survey nung America nunger Evangelical Protestant 1,000 shii shilem agia liasü aser parnok rongnung shilem 51-ibo, Yihuda nunger ya tang tashi Tsüngremi shimtetba nüburtem lir ta bilemer, ta telangzüba agütsü.

Parnok shilem 19-i, Yihuda nunger ya Tsüngremi shimtetba nüburtem asü masüar mejangja, ta ashi aser shilem 17-ibo Yihuda nunger ya Tsüngremi shimtetba nüburtem liasü saka tangbo Tsüngremi shimtetba nüburtemji Khristantem dang lir ta bilemer. Ano shilem agir shilem 10-ibo Yihuda nunger ya Tsüngremi kodanga Pa nüburtem ama meshim, ta ashi aser shilem 2-ibo tanga telangzüba balala agütsü.

Iba survey nung shilem agir arrshi küm 70 dak temapurtem rongnung shilem 59-i Yihuda nunger ya tang tashi Tsüngremi shimtetba nüburtem lir, ta ashi aser arrshi küm 40 tekübokpurtembo shilem 44-i dang kasa telangzübaji agütsü.

Iba survey nung Israel nunger tongtibatanga asü Yihuda nunger tongtibatanga, ta asadanga liasü aser iba atemaji scale 1 nungi 5 tashi amshi; tetezü 1 ji kanga tongtibatanga masü aser 5 jibo kangasa tongtibatanga. Iba survey nung shilem agir shilem 48-i Israel pusemer aser Yihuda nungerji tongtibatanga ta telangzüba agütsü.

Kasa report ajanga ashiba agi, Evangelical Khristan shilem 20-i Yihuda nungerji Tsüngremi shimtetba dang masü saka parnokia pusemer, ta ashi.

December 1, 2021 nü osangbener den jembidang Infinity Concepts nung CEO,

Mark Dreistadt-i, "Yihuda aser Israel nungeri Evangelical Khristantem ya 'monolithic group' ka ama bilemer aser parnok Yihuda nunger aser Israel nunger ajak pusemer," ta metetdaksü.

Mark-isa, "Iba ya shidak masü ta onoki meteta liasü, saka iba ya asadangsüji tongtibatanga ta bilema onoki tajungtiba agi inyakogo," ta metetdaksü.

"Iba onük nung nisung aikati pei tangatetba tejangja memetdaksü saka iba ya ajanga Yihuda-Khristan tesendaktep tsütsü awareness, shisaliok aser amalitepa inyakba tsütsü maongka tajung lir ta asadangteter," ta paisa metetdaksü.

"Protestant Evangelicals-i Yihuda nunger pusemer ta nibo angateter aser Yihuda nungeria Evangelical Khristantem pusemer," ta pai ashi.

"Yihuda nunger aser Evangelical Khristantem tsüngda tangatetep, melung lemtepe aser kati ka tushiba ajanga iba tesendaktep maneni aintsü ta ni amanger. Iba survey nung ajemdaker taruba kümtem nunga iba tesendaktep asadangsü," ta pai ashi.

Israel aser Yihuda nungerji kanga tongtibatanga ta langzürtem dang onük aika nung tasüngdangba balala asüngdanga liasü, item onük rongnung "Holocaust (World War II mapang Yihuda nunger million aika tepsetba) mapang jenburtem yariba," "Israel nung timtemertem yariba," "US nung Israel pusemer yimtenren lenirtem pusemer," "Bendanglen aliba Yihuda nunger pei lima-Israel-i aotsü atema yariba," "Israel nung medical services aser first responders yariba," "Khristan yimsü dak sendakba nung Yihuda nunger putiotsü bushiba tsütsü yaritsü", "Laishiba nung shia aliba tesemtem bushiba aser wazüka ayuba tsütsü yariba" aser "Messiah amangertem aser Israel nung business yariba"

densema liasü.

Telangzüba agütsürtem rongnung timbakati (shilem 27) Israel nung timtemer kibongtem yaritsü telangzüba agütsü aser shilem 16-i Khristan yimsü dak sendakba nung Yihuda nunger putiotsü bushiba tsütsü yaritsü telangzüba agütsü.

Tanga onüktem nung telangzüba agütsürtemji shilem 7 nungi shilem 11 tsüngda liasü.

Osangbener den jembidang Grey Matter Research Tir, Ron Sellers-i, United States nung Evangelicals aikati yimtenren dak mesendakba lenla balala nung Israel aser Yihuda nunger yaritsü melungba iba survey ajanga bushitetogo, ta ashi.

Sellers-isa, "America nunger Evangelical Protestants aikati US nung Israel nunger pusemer aser yimtenren lenirtem yaritsü dang nungibo Israel aser Yihuda nunger yaritsü ang shimmer. Iba tetezü Evangelicals atema yimtenren onük dang nungibo Israel nunger tongtibatanga," ta ashi.

Anti-Defamation League-iashiba agi, alima nung Yihuda nunger anema inyakba aser sempaba kanga bulua kümogo. 2017 küm nunga January nungi September ita tashi nung Yihuda nunger anema inyakba tatalokba 1,299 liasü, aser 2016 küm mezüngbuba ita teku nung tatalokba 779 den medemdangra ibaji shilem 67 agi timba akümba liasü. Tanü tashi alima tesem aika nung Yihuda nunger sempar jenti lir, ajisüaka Tsüngremi shimtetba nüburtemji parnok lir ta aikati amanger. Linük kanga tila aser nüsüng ishika dang süaka tanübo alimai Israel linük dak kanga ranglokba aikati shisadanger. Akhidang nungi Israel nung rara balala aika rara-aruba otsü asenoki Laishiba nung azünger, aji oda kin aikati parnok samatsütsü merangogo. Israel nunger rara atalokba shia nisung aikati, iba ya tatembang anogo anasai aruba temaitsü rongnung ka südi ta bilemer.

ANO GO ABEN TSÜNGREM DEN

Asükumi nisung ludaktsür

"Asüküm agi teraksa adokdaksür, aser ngasangatem agi ludaktsür." A. Shin 16:18

Tsüngremi asenok ajak nem sempet balala agütsür alimai arur, aser asenok nem Tsüngremi agütsüba sempet nungji ajemdaker, ajemaluba, tila kuma asen takümüji lira asenok ajak pa temoatsü aser alima nung ali tashi azükaru nung tembangtsü. Saka, aiben asenok meimchir aikati Tsüngremi agütsüba sempet nungji ajemdaker, takokba menden atong dangbo asüküm tashi nem kokdaksür. Kodang asüküm nem asen takümüji kokdaksütir, kenübosa asenok laotsü. Kechiaser asüküm tashi bener asenok talangkabo motet, asenoki asen sasa otettsü, tongtettsü ta asüküma bilemetsü saka makoktsü. 1 Samuel 13:8ff nungji, Chuba Saul, Isreal nunger otsü nungbo mezüngbuba chuba. Tsüngrem maongkaji Sauli ulura ajuru saka, Saul dak asüküm aser ngasangatempa jakla aliba ajanga, mapang tatsüka dang pa chuba menden nung yimsüsürbo, pa aser par kibong tamakok nung tembang. 1 Samuel 13:13, "Samueli Saul dang ashi, Nai tamashi inyakogo; nai Kibuba ne Tsüngrem temelaba koba pai ne dang mela aji meinyak; kechiyong ne yimli Israel madak teti asoshi Kibubai yanglutsür lila..."

Kibuba Yisu, iba asükümba aser ngasangatem jakla nungi onok kümzükangma, kechiaser iba asüküm temenen yagi nisung jakla dang masü saka tanela jenjanga raksatsür. Amen

Kirk Franklin-i tang mezüng Khristmas film ka produce süogo



December 03, 2021: Grammy Award angur osangtajung kentener, Kirk Franklin-i tang mezüng Khristmas film ka produce süogo aser iba film ji tan hopta tatembanglen sayatsü.

'Kirk Franklin's a Gospel Christmas' filmji tan Honibarnü (November 4) Lifetime nung sayatsü. Iba film nungji Demetria McKinney, Chaz Lamar Shepherd aser Jen Harper nungeri tongti shilem agia lir.

Tawa interview ka nung jembidang Franklin-i, "Iba film ajanga osangtajung kentemji Amongnü dang masü saka anogo ajak nung taküm litetba kentem lir ta kuli sayur aser osangtajung kentemji TV, Broadway aser film nunga sayutettsü ta kuli sayur," ta metetdakja liasü.

Franklin ya iba film executive producers rongnung densema lir. Film nung Olivia (McKinney) indang otsü shia lir. Olivia ya assistant pastor ka lir, aser Khristmas atongtsü ita ka shi dang lia la nem senior pastor shilem agütsür.

"Tebur süaka tetsür süaka Yisu Khrista osangtajungji

sayatsüngitsüla aser alima den lemsateptsüla. Iba film ajanga Khrista osangtajung aser ochi indang otsütem ashir," ta Franklin-isa metetdaksü.

Paisa, "Talisa Arogo nung intetba mapang ni aika ajangshiogo. Sayatsüngirtemi ashiba ama nai melitetra ola adoktsü atema nü dak temeden mali," ta ashi.

"Khristan sobaliba nung aika atalokogo, aser iba film otsü ajanga na shiba südir süaka nü dak aketba yimya bener Kibuba dangi arutsü ajungshir," ta paisa asi.

Iba film repringertem, talisa Arogoi yirutsür alirtemi 'onok menenpurtem saka taochi agi kümzük' ta taliba angatettsü imlar, ta paisa shisem.

Iba film sayaba ajanga tarutsü nung Khristan film aser osangtajung nung ajemdaker TV shows aika tenzüksü imlar, ta pai ashi.

Iba film ya Erica Sutherlin-i direct asü aser producer temji Franklin, Leslie Greif, Eric Tomosunas aser Ron Robinson nunger lir. Film production nung Swirl Films & Big Dreams Entertainment-ia shilem agiogo.

OLONG PAITEP # 6016

1				2					3	
						4		5		
6			7							
					8		9			10
11										
12		13					14			
		15								
						16				
	17									
					18					

TIPLÉN

- 1. Yakob tetsü - (6)
- 4. Mezüng nisung - (4)
- 6. Tasen lai kaket ka - (5)
- 9. Au lanu - (2)
- 12. Tejen lai 21 buba - (11)
- 15. Tekolak tembar - (2)
- 16. Zütsüra anepsang - (5)
- 17. Kain tenu - (4)
- 18. Hana-er jabaso - (6)

LANGTSÜNGLEN

- 2. _ _ _ gki - (3)
- 3. Telungpur telok ka - (2)
- 5. Tsüngremi mezüng paktetdaksüba - (5)
- 7. Tia - (4)
- 8. Yakob-er jabaso ka - (5)
- 10. Abraham tebutü - (4)
- 11. Rebeka kinungpu - (4)
- 13. Esau tenu - (5)
- 14. Tzünglu tilala aru - (4)
- 16. Jafet tebu - (3)
- 17. Teka agi kongshi - (2)

OLONG PAITEP # 6015 TELANGZÜBA


TIPLÉN :

- 2. Pongsen, 5. Lepko, 7. Omen,
- 8. Maongka, 10. Yangkhu,
- 12. Senpong, 14. Angu, 15. Raksa,
- 16. Arameso,

LANGTSÜNGLEN :

- 1. Alimang, 2. Pongen, 3. Samaru,
- 4. Nün, 6. Pio, 9. Nüngdak, 10. Yongya,
- 11. Kongro, 13. Ora, 14. Ata.

Noksa nung meputepi aliba 10 bushiang



TANÜBO NAI LANGZÜANG

- Q. Koba State indang Tourism Department-i STREET (Sustainable, Tangible, Responsible, Experiential, Ethnic, Tourism) project lapok?
- [A] Tamil Nadu
 - [B] Goa
 - [C] Kerala
 - [D] Sikkim

(Taruba adok nung onoki langzüsü)
YASHI ADOK TELANGZÜBA : Jews

AO OSHI ANGAZÜKDAK:

TANÜ ANGAZÜKTSÜBA OJANG



Tir Yimym

Likok

- (n) süngjang taku tilala, aon aser lon yanglur (small bitter eatable fruit)
- * Ozü tsüki nung likok dong aika lir.

Liku

- (n) yong agi ladakladaka atakba molok (flat bamboo basket)
- * Kütsüi liku nung aniüshi akonger.

NAI-A YA METETTER MA



1996 küm December 04 nü 7buba 'Billboard Music Awards' sentong nung Canada tsür ken zülur aser kentener Alanis Morissette-i 'Top Artist', 'Top Billboard 200 Album' (Jagged Little Pill kensep atema) aser 'Top Female Artist' Award angu.

SUDOKU # 6057

			9	8				2	
	9							3	5
				4	9				
				1	6				
8		2	7					4	
			3						
2	3		5						
			1	6	2	3	5	8	
7	8								

TELANGZÜBA # 6056

3	1	7	4	8	6	2	5	9
9	5	6	7	1	2	3	8	4
4	2	8	9	3	5	7	6	1
2	3	5	6	9	8	4	1	7
7	8	4	1	2	3	5	9	6
6	9	1	5	4	7	8	2	3
5	4	3	2	6	9	1	7	8
1	6	2	8	7	4	9	3	5
8	7	9	3	5	1	6	4	2

OJANG LUTEP # 5603

AAMNPG	:										
IKAAAG	:										
OTKKA	:										
DANG	:										
URGAN	:										
SIEAN	:										
ERMAANG	:										
KBIAANY	:										
AAMOKJ	:										
AÜÜMMTKS	:										

OJANG LUTEP TELANGZÜBA # 5602

SENTI TAKÜM KAJI ALIMAR RONGSEN DANG NUNGI KANGA AGI TAOPA

TAN HOPTA ATEMA - KOMA SÜLA ?

- Q. Kohima nung Hornbill benjong amongtsü atema Kisama yim akümba ama, Mokokchung district nunga yim ajunga adenshia sobaliba benjong amongdak yim tasen ka mesemtet nunga koma süla ?



New Delhi, December 03, 2021: Hokolbarnü Parliament House nung Lok Sabha Speaker, Om Birla densema lenirtemi India nung mezüngbuba Tir, Dr Rajendra Prasad asoba anogomong nung asür nem akhüm agütsüba sülen tangokba noksa nung angur.

Rajya Sabha senden nung Zero Hour mapang onük 17 benok

New Delhi, Luchii/December 03 (Agencies): Tesüiba anogo pezünü tashi Rajya Sabha senden junga magiteti aruba sülen Hokolbarnübo Rajya Sabha nung Zero Hour mapang onük 17 benoka liasü, ta osang ka ajanga metetdaksü. Hokolbarnüa Rajya Sabha nung treasury benches aser Opposition züngsemtem tsüingda mangatetep tera adoka liasü. TRS züngsemtemi national policy on foodgrains procurement, legal guarantee for Minimum Support Price (MSP) atema takhangba agütsüba dak alaka senden kanga junga agitetogo. Tanübo senden tiptema agitetba atema Chairman, M

Venkaiiah Naidu-i züngsem ajak dang pelaba lemsatepa liasü. Naidu-i, "Senden tiptema agitetba ajanga Zero Hour nung onük 17 benoktetogo," ta ashi. Paisa, senden nung züngsem ajaki o jembitsü atema maongka angu, yamaji senden nung timtem magütsüra o jembitsü atema maneni maongka agütsütsü, ta pai ashi. Asükwa mongpu senden tenzüka sülen mezüng anogo nungi tenzüka anogo pezünü tashi Rajya Sabha senden junga magiteti aruogo. Tesüiba anogo pezü tashi Congress, DMK, AAP, Left aser Trinamool Congress lenirtemi tang anenja aliba MP tem tanaben aniokang ta takhangba agütsüba ajanga

senden junga magiteti liasü. August ita nung Rajya Sabha nung General Insurance Business (Nationalization) Amendment Bill, 2021 agizükdang opposition MP tem jagi sabangleni oa timtem agütsüba ajanga tan asükwa mongpu nung parnok 12 anentsü. Rajya Sabha nung tan mongpu piyong anentsüba MP temji Congress, Trinamool Congress, Shiv Sena, CPI aser CPM party tem nungi Phulo Devi Netam, Chhaya Verma, Ripun Bora, Rajamani Patel, Syed Nasir Hussain, Akhilesh Prasad Singh, Dola Sen, Shanta Chhetri; Priyanka Chaturvedi, Anil Desai, Elamaram Kareem aser Binoy Viswam nung lir.

Passenger 16,000 nungi 18 dak Covid putet: Mansukh Mandaviya

New Delhi, December 03 (Agencies): India nung coronavirus variant tasenba 'Omicron' kanga tsübutepba mapang nung Hokolbarnü Parliament nung Union Health Minister, Mansukh Mandaviya-i, 'risk' aliba linüktem nungi tayimtsü ajanga aruba passenger 16,000 dak RTPCR test agiogo aser parnok rongnungi nisung 18 dak dang coronavirus putet, ta metetdaksü.

Health minister-isa, coronavirus putetba passenger shia dak Omicron tendangtsü atema genome sequencing agidar, ta metetdaksü. Lok Sabha nung Question Hour mapang telangzüba agütsüdagang pai, coronavirus wara prokba nokdangtsü atema state ajak ket nung mozü peria alitsü atema inyayim tenzüka den külemi Centre sorkari tayongzüka balala atema renema lir, ta metetdaksü.

"Scientific tetuyuba nung ajemdaker tanurtem nem booster dose agütsütsü atema telemtetba agütsü," ta shia pai opposition party tem dang scientist tem dak melung alemtsü mepishi.

Tawa linük kar nung Omicron variant putetba sülen India Health Ministry-i 'Countries at-risk' list ka sangdonga liasü aser item linüktem nungi arurtem dak sendakba tetuyuba kar agüja lir.

'Countries at-risk' list nung aliba linüktem rongnung United Kingdom, South Africa, Brazil, Botswana, China, Mauritius, New Zealand, Zimbabwe, Singapore, Hong Kong aser Israel linüktem densema lir.

Item linük nungi arur ajak India tonga aruba sülen RTPCR test agütsü aser negative putetra anogo 7 home quarantine asütsü aser anogo 8buba nunga ano khen tendangtsü.



December 03, 2021 nü New Delhi nung International Day of Persons with Disabilities anogomong sentong ka nung linük Tir, Ram Nath Kovind-i National Award lema agütsüba noksa nung angur.

UP nung Yogi-i aniba sorkari nungjaga dang melener: Akhilesh Yadav

Jhansi, Luchii/December 03 (Agencies): Uttar Pradesh nung Chief Minister, Yogi Adityanath-i aniba sorkar aija Hokolbarnü taoba mapang Chief Minister aser Samajwadi Party (SP) Tir, Akhilesh Yadav-i, BJP-i state nung tesem balala aser nisungtem tenüing ang melenshitsür, yamaji kobi melii sorkar-a melenshitsü, ta metetdaksü. Jhansi nung lokti senden ka nung jembidang Akhilesh-i, "Yogi sorkari tesem balala tenüing ang melenshitsüogo. Kobi melii Uttar Pradesh nung

nüburtemi sorkar-a melenshitsü. Uttar Pradesh nung lanurtem, aluyimertem aser shishilembartemi Yogi sorkar agientsü atema telemtetba agiogo. Uttar Pradesh nung Samajwadi Party-i sorkar kümra aluyimertem kanga tajangzüak angutsü," ta metetdaksü. "India nung tetsürtem anema inyakba ken o timtiba aliba state ji Uttar Pradesh lir. Linük nung tiyazü raraba nung ajemdaker nisung timtibi tepsetbaji Uttar Pradesh sorkar lir," ta pai ashi. Sangküm küm tetenzüklen Uttar Pradesh nung Assembly

elections agütsü. 2017 küm Uttar Pradesh assembly election nung BJP-i menden 403 nungi menden 312 nung takok ngua liasü. SP-i menden 47 angu, Bahujan Samajwadi Party (BSP)-i menden 19 aser Congress-i menden tenet nunga takok ngua liasü. Rashtriya Lok Dal (RLD) aser Nishad Party nati menden kaka nung takok angu, Apna Dal-i menden teku, Suheldev Bharatiya Samaj Party (SBSP)-i menden pezü aser independent candidate aseme menden kaka ngua liasü.

Parliament kima opposition aser BJP MP tem mangatetep adok

New Delhi, December 03 (Agencies): Hokolbarnü Parliament kima Rajya Sabha nung opposition MP 12-i longkak aitba mapang kasa tesem nungjisa BJP-ia longkak ait.

Rajya Sabha nung anenja aliba MP temi Parliament kima Mahatma Gandhi kürakyanglu anasa mener longkak aitba mapang BJP MP tem ozülü balala amer longkak aita parnok alidaki arua mangatetep adoka liasü. BJP züngsem, G V L Narsimha Rao-i, "Opposition party temji taila, ta sayutsü atema onoki yagi aru," ta metetdaksü.

opposition züngsemtem nem timtem agütsü, ta ashi.

Ajisüaka Minister of State for Parliamentary Affairs, Arjun Ram Meghwal-i, Mahatma Gandhi kürakyanglu anasa longkak aitsü atema BJP dak-a temeden lir, ta ashi.

"Parliament telung nung opposition MP temi security officials anema inyakba atema BJP-i longkak aiter," ta paisa ashi.

BJP züngsemtem jagisa Gandhi kürakyanglu nungi Babasaheb Ambedkar kürakyanglu tashi longkak aita oa 'democracy kümzügang' ta yimyim ayima liasü.

Taküm August ita nung Parliament nung timtem agütsüba ajanga Hombarnü Rajya Sabha nung opposition MP 12 asükwa mongpu Parliament piyong atema anenja liasü.

Rajya Sabha nungi anentsüba MP 12 rongnung Congress nungi MP trok, Trinamool Congress aser Shiv Sena na nungi anana aser CPI o CPI(M) na nungi kaka lir.



December 03, 2021 nü Patna nung Bihar assembly agiba mapang opposition MLA temi assembly kima longkak aitba noksa nung angur.

Novel Prize agizüki aotsü Maria Ressa nem temelaba agütsü



Maria Ressa

Manila, Luchii/Dec. 03 (Agencies): Philippines nung aliba appeals court kati osangbener Maria Ressa nem taruba hopta Oslo-i oa la indang Nobel Peace Prize 2021 sempet agizüksü melaogo.

Manila nung amenoka aliba news website, Rappler indang CEO, Ressa den Russia nung osangbener Dmitry Muratov na nem osang tiazü prokshiba aser social media nung osang taila prokshiba anema raraba asoshi iba konang tetushi ya agüja liasü.

Tir Rodrigo Duterte indang administration ajanga la aser lar news organisation anema ken o kar benoka aliba mechi Ressa ya linük yutsür aotsü asoshi court nungi temelaba ka agitsüsa akumer.

Hokulbar nikongdang pangzüng ka sangdongba nung Court of Appeals ajanga Ressa-i December 8 nü linük yutsür oa Norway yimtiba nung December 10 nü iba sentong nung adentsü asüngdangba mela. Ressa dang December 13 tashinung linüki meyipa shilangtsü totuyuba agütsü.

Boston nung aliba Harvard University nung ita ka lecture balala agüja United States nung aliba sülen tawa ang Philippines yimtiba tonga aru, ta Ressa-i Hokulbar nep osangbener dang ashi.

Lai court dang iba kasa mapang Florida nung Thanksgiving holidays nung tetsür arishi küm 76 tain shiranga aliba semdangtsü

sentong lir, ta ashi.

Harvard nung lecture agütsü asoshi la tsüngtong aotsü nungdak ta ajiteta appeals court ajanga US-i aotsü mela liasü. La indang Nobel Peace Prize osang sangdonger anogo ishika dang lir la nem iba temelaba ya agüja liasü.

Taoba mapang Ressa ya US-i oa National Press Club nungi 2020 International Press Freedom Award agizüksü liasü, saka Court of Appeals ajanga memela.

Kasa court yagi December 2020 nung lai tetsü semdangtsü asüngdangba memela aser iba ya tongtipang ka masü, ta shia liasü.

Taoba mapang la Harvard University-i aotsü atema sen P500,000 (\$10,000) agi züngzüktepa aliba ya la Norway-i aoba nung amshitsü, ta court ajanga ashi.

Duterte indang okatsür Solicitor General Jose Caladibo la Norway-i aotsü aliba anema liasü aser la tayimtsü nung senzütsü lendong lir, ta ashi.

Ressa ya Philippines kisung masü saka US sensoa lir aser la atema bendang lima nung jenoka alitsü tebilemba mali aser la Philippines nung alitsü molungtetogo, ta ashir.

Duterte busemertemi amokmerenaka aser la anema ken o aika benoka liaka taoba mapanga Ressa-i mapang shidak nung Philippines bushia arua liasü.

Iraq nung ISIL temi civilian aser sepaitem tepset

Baghdad, Luchii/Dec. 03 (Agencies): Iraq north tsütsü yimtsüng ka nung ISIL (ISIS) temi amakba nung civilian asem densema asü-amar aika liasü, ta ketdangsurtemi ashi.

Iraq indang Kurdistan Regional Government (KRG) nungi security forces temi Brehostibarnü menor sangdong ka agütsüba nung, ISIL temi Iraq indang Makhmour region nung Mount Qarachogh kübok Khidir Jija yimtsüng nung nisung aliba ki aika amak, ta ashi.

"Tia maka yangi civilian tem rongnung asü-amar aser yiruyiponger tem lir," ta ashi.

Yangji aliba Rudaw osang ajanga ashiba agi, iba lendong nung asürtem nisung ter lir aser item rongnung Peshmerga ta ajaba Kurdish security forces züngsem tenet densema lir.

Hokulbarnü sangdong ka nung KRG Tir Nechirvan Barzani-i iba lendong ya aitsü, kong kibong ka nungi adianu asem tepset aser ano civilian aika yirutsü, ta ashi. Iba mapang Peshmerga züngsem kar tepset aser kiralongrar bushiba mapang kar yiru, ta pai ashi.

"ISIL kiralongrar temi amakba asoshi telangzüba tesashi agütsütsü nungdaker aser Iraq nung mitkar aser defence tsütsü tashi tait mera agitsüla aser Kurdistan Region ajanga parnoki mapa tamajung inyakba teti asoshi anentsütsü renema lir," ta Barzani-i ashi.

Peshmerga aser Iraq sepaitem tsüngta tawa adoka

aliba asüngtsü atema Iraq army aser Peshmerga tsüngta tali angateteptsüla aser international coalition nungi tali yairitsüla, ta pai ashi.

Civilian aser security forces dak tenük yoker tawa ISIL temi lendong aika agüja arur. Taoba hopta Diyala nung iba telok yagi Peshmerga züngsem pungo tepseta liasü, kong yirur alirtem yaritsü arur dak atsüka atar amakba tasa amshia amak.

2014 küm ISIL temi Iraq aser Syria nung alinük tuluka agia liasü. Iba telok anema azüdokshia rara aruba sülen parnok kübok aliba alinük rakzükdaktsü aser 2017 küm parnok madak takok ngua liasü.

Ajisüaka parnok tasa melenshiba sülen Iraq kübok province kar nung ISIL ya tang tashi lendong lir, shirnoki lendong agütsür jena aor, tashiyim agi nisung apur aser lenmang tezülen bomb yutsür pokdaktsür.

Kasa mapang Diyala province nung semi-autonomous Kurdistan region aser Iraq indang federal government tsüngta arütsü tsütsü mangatettep aliba den Kurdish sepai aser Baghdad nung aliba sepaitem tsüngta osangtsüsang junga magitepba ajanga security tsütsü tetsüngta adoka ISIL temi par tashi tali amshir.

Küm tatem tashinung United States-i par sepai ajunga Iraq nungi anizüker aotsü renemshiba mapang lendong tali ataloker.

Saif Gaddafi tir atema tokteptsü Libyan court-i melar



Saif al-Islam Gaddafi

Tripoli, Luchii/Dec. 03 (Agencies): Libya nung mapang talangka yimsü süa arurang Muammar Gaddafi'er jabaso taruba tir election nung tokteptsü asoshi melaogo, ta pa indang okatsüri ashi, shiba küm ter shi tejakdang tebu anema nüburtemi nokdangba mapang mapa tamajung inyakba yong election nung tokteptsü metemsü, ta Libyan ketdangsurtemi hopta ka tejakdang sangdonga liasü.

Saif al-Islam Gaddafi indang okatsür Khaled al-Zaydi-i osangbener dang Brehostibarnü ashiba agi, Sebha nung aliba court ajanga pa indang client-i mepishiba agizük anungji ita tatemlen

agitsü aliba tir election nung tokteptsü.

Gaddafi ya tir election nung tokteptsü metemsü ta Libya indang electoral commission ajanga sangdongba mapang electoral law ka tuteta ashi, kong candidate tem mapa tamajung atema temerenshi magi alitsüla aser mapa tamajung inyakba nungi asüngteta alitsüla, ta shia liasü.

Election ya koba yimya nung agitsü ta atsütepaka anüolen linüktem nungi ketdangsurtem densema United Nations-i anir December 24 nü nungi tenzüka agitsü aliba election maparen atema jembir.

NATO teyari nung nüburtemi apusoba ajanga totzü peria aliba linük nungya 2011 nung Muammar Gaddafi tepsetba sülen Libya nung küm ter shi azüdokshia aruba anentsü meranger.

Rara mapang mapa tamajung inyakba ken o nung Saif al-Islam Gaddafi ya International Criminal Court-i bushir, aser pai linük tir atema tokteptsü asoshi November 14 nü tenüng agüja liasü, saka taoba hopta elections board

ajanga candidate 25 magizükba nung pa densema liasü.

Par 25 ya legal ground aser ketdangsur nungi osang balala agütsüba nung ajemdaker magizük aser parnok rongnung public prosecutor, police tanishir ka, passports and citizenship department nung tekolakba ka densema lir.

Iba atema Gaddafi-i Sebha nung temepeshiba ken o ka benoka liasü, saka taoba hopta ozüng alema mapa tamajung inyaker telok kati court amak, anungji ghonda ishika ken o mejembittetsüsa akum, ta Tripoli nung aliba sorkari ashi.

Election nung tokteptsü atema tenüng agütsür candidate tesashi rongnung pa ya mezüngbuba liasü, shiba küm aika atsükshia arur July ita The New York Times dang pa yimtenren nung tanaben tetsüng ajemoktsü sentong lir, ta shia liasü.

The New York Times den sensaksemba mapang, küm ter rongronga aruba sülen telungjem samar aliba tanaben lidaktsüner, ta Gaddafi-i ashi.

Mapang tatsüka lir Libya anüdoklen pa den mangatettep aliba administration kati tatok

agütsü.

Linük anüdoklen aser anüolen telok lemsar atsütepapa aruba mapang apular ka ama taküm telungjem sorkar ka tentetba sülen iba election yagi yimjung maparen nung timtem agütsütsü akok, ta aikati tsübua bilemer.

Election atema candidate tenüngtem ano mesangdong lir.

NATO teyari nung tebu anema raraba mapang tebu küm 40 yimsüsüba kumzüksü mechi takok monguteti raradang mapa tamajung inyakba atema Tripoli nung aliba court kati 2015 küm Gaddafi meliaka tasüba agi merenshitsu obendang agüja liasü.

Tebu indang taoba sorkar meimer Libya nung asoshi pa ya nübu tejangja ka lir. Pa okatsüri court obendang sangdongba sülen Sebha nung pa busemertem benjongtepa liasü, ta tenük kuli alirtemi ashi.

Ajisüaka azüdokshia tebu atsüngdokba sülen election nung pai shilem agiba ya magizükteter, ta Libya nung aikati ashir, aser item rongnung telungpur teloka aika lir.

Ano Libya tir election nung

tokteptsü asoshi tenüng agütsür rongnung linük anüdoklen amenoka aliba sorkar senzüka yutsür mitkar tanishir Khalifa Haftar ya ka lir. Haftar'er Libyan National Army (LNA) yagi Libya anüdoklen aser south tsütsü tesem timba amokbanga lir. Taoba mapang CIA asoshi inyaksang Haftar ya rara mapang mapa tamajung inyak, ta tai tonglokja lir.

Tir asoshi tokteptsü atema Gaddafi nem tanaben maongka agütsüba ajanga nüburtemi election inyakyim nung tamang akaba samatsü, ta Libyan researcher aser Sadeq Institute tentetsang Anas El Gomati-i osangbener dang ashi.

"Anogo ishika tsüngta election dak sendakba maparen reprangdangra, candidate kar metemsü ta sangdong, aser ozüng sapoka mejembi tanaben temelaba agütsü," ta El Gomati-i ashi.

"Saif al-Islam Gaddafi aser Khalifa Haftar nungertemi election nung tokteptsü aliba anema nokdaker Libya nung aika mangmangtsü."

"Ya tatem masü, saka ano ishika arutsü lir," ta paisa ashi.

Wokha nung training ka ayongzük

Wokha, Luchii/December 03, 2021 (TYO): Jal Jeevan Mission mapatong kübok yimtsüngtem atema PHED Department Wokha Division-i Brehostibarnü Skill Development nung training ka ayongzük, ta sangdong ajanga metetdaksü.

Executive Engineer, PHED Wokha, Er. Imnazulu Ao-i, stakeholder tem dang inyakyim balala sendaktepa aliba metetta lidaktsütsü nükjidadong nung iba training ayongzük, ajiasünungang 'water supply infrastructure' nüngdakba maparentem shitak inyaktetsü, ta ashi.

Pai, stakeholder tem dang project tema inyaker sülen water supply infrastructure indang maparen timi

achaayanga aser aneplautsi asoshi ajungshia liasü.

Maparen pezü talisa plumbing, masonry, electrician, welding nung hadir aser oset tem amshiba yimya meteta lidaktsütsü asoshi tesayuba den practical session agia liasü. Iba den külemi, workshop agiba mapang takotet temi 'water testing kit' amshiba yimyatem sayuogo.

Kasa workshop sentong ya Bhandari sub-division nung SDO PHED, Bhandari, Er. K. Hukato akhüm nung agia liasü.

Wokha nung iba training sentong nung Er. Zuchamo Kikon (JE) menden liasü aser Er. Chenithung Ezong, JE PHED Wokha Division-i tepela anküp o jembu.

Ministry of Power-i Painting Competition ayongzüksü

Kohima, Luchii/December 03, 2021 (TYO): Doyang Hydro Electric Plant, NEEPCO Ltd.-i sangdong ka nung, Bureau of Energy Efficiency ajanga Ministry of Power, Govt. Of India-i Energy Conservation 2021 nung XV Painting Competition ayongzüksü. Iba State Level Painting Competition - 'Energy Conservation-2021' ya December 08, 2021 anepdang 10:00 ako meta East Gate

Hotel, Kohima nung ayonga agitsü terenemba lir, ta metetdaksü.

Nagaland nung iba sentong ya Nodal CPSU i.e. Doyang Hydro Power Station, NEEPCO ajanga achaayanga agir. State level nung iba sentong agir asünung, tongti tesemdanger Dept. of Education, Nagaland nungi Director ajanga iba sentong ketdangsüa agitsü, ta kasa sangdong nung shia lir.

Security Forces-i Khelma nung medical camp ayongzük

Dimapur, Luchii/December 03, 2021 (TYO): HQ IGAR (N) kübok Assam Rifles, Jalukie Battalion ajanga November 30, 2021 nü Peren district kübok Khelma yimtsüng nung Medical Sub Centre den lungjemer medical camp cum vaccination drive ka ayongzük liasü.

mozü tem agütsü.

Yimdaklir dang COVID-19 vaccine agitsü ajungshia liasü. Iba camp nung tebur 32, tetsür 43 aser tanur 21 ajangzük liasü. Aser ano nisung ter nem vaccine dose tanabuba agüja liasü.

Security Forces temi nüburtem asoshi iba ama mapa tajung inyakba atema yimtsüng nung aliba GBs aser Council Chairman ajanga pelaba lemsatepa liasü.

Iba sentong nung yimdaklir dang COVID-19 tensa nung temang anema alitsü asoshi inyaksangshi balala indang rateta ashi aser nüngdakba

3buba Nagaland Film Festival tenzükogo



Kohima, Luchii/December 03, 2021: Hokolbarnü, Capital Convention Center, Kohima nung 3buba Nagaland Film Festival lapokba sentong agiba mapang, Chief Secretary, J Alam IAS-i online film festival nung takok angur nem sempet agütsüba noksa nung angur.

Kohima, Luchii/December 03, 2021 (TYO): Hokolbarnü, Capital Convention Center, Kohima nung kanga dang yongya ataba 3buba Nagaland Film Festival, Hornbill Edition tenzükogo. Iba Film Festival lapokba sentong nung Chief Secretary, Nagaland, J. Alam, IAS alakteta tejaoker ama dena liasü, ta sangdong ajanga metetdaksü.

Iba sentong nung, Chief Secretary-i, entertainment, osang aser education den lokti nung temelenshi tulu adokdaksütsü atema tongti shilem agitsü film dak tashi lir, ta ashi.

Sobaliba aser art sayutsü asoshi film yagi shilem ka agir, ta pai shisem.

Alam-i, Naga nunger flim yanglurtemi yangluba film tem ya national sabang nung dang masü saka international sabang nunga ajemoka alimai jangjatsüsa mera agiogo, ta pai ashi.

Iba film festival ajanga Northeastern State kisüing nungi masü saka India aser alima tesem balala indang cinema nungi telangzüba tajung nguogo, ta pai shisem.

Chief Secretary Alam-i, film yanglurtemi Northeastern State film tem sapuba/jangraba sayuogo, ta ashi.

Mapa maongka

(employment opportunity) agütsütsü atema film industry dak tashi tulu lir, ta pai ashi.

State nung film sector aintsü imlar aser ibaji ajanga national aser international sabang nung jenjang ka ajangzüktsütsü imlar, ta pai lemsatep.

Alam-i, State nung film atema nodal department - IPR Department-i Nagaland Film Policy yanglutsü asoshi tim mera agia inyaksangshidar, koba ajanga local artists aser iba den külemi Nagaland-i arur film yanglurtem tem yaritsü, ta ashi.

Iba Film festival sentong agiba mapang State nung film yanglutsü sempet tajung alirtemi iba sabang shitak nung amshitsü aser takotet ajanga sayuba angazüktsü imlar, ta pai lemsatep.

Additional Secretary, IPR, Asangla Imti NCS-i telok pela agizük. President, Nagaland Film Association (FAN), Kivini Shohe-i, Nagaland nung film yangluba maparen renloka aoba/ainba jenjang ka nung lir aser cinematographers, directors, writers, actors tajungba akümtsü asoshi pei sempet tali arangshitsü nüngdaker, ta ashi.

Mapang ajak nung amalitepa inyakba aser nungitta yariba atema lai Department of IPR dang pelaba metetdaksü.

Iba sentong nung Pelenuo

Yhome-i ken ka aten aser sentong agiba mapang online film competition nung takok angurtem sangdonga liasü. Abnormal atema Tiakumzuk Pongener-i 1st prize angu. Tiakumzuk-i senpet 25,000 den certificate agizük. The Dancing Philosopher atema Cinematixx-i 2nd prize angu, kong Cinematixx nem senpet 15,000/- den certificate agütsü; aser The Bright Side atema Kupe-ü Krome den Forever & Always atema Rehti Thonger na sentepa 3rd prize angu aser tena nem senpet 10,000/- den certificates agüja liasü.

Maneni, iba film festival sentong mezüing anogo nung Angh, An Engineered Dream, Bethlehem aser Look at the Sky film tem sayuogo. Kasa sentong nung Film tourism nung Alexander Pou ajanga Masterclass agi aser Munish Bhardwaj-i Scriptwriting nung workshop achaayanga agia liasü.

Nagaland Film Festival ya Film Association of Nagaland (FAN) aser National Film Development Corporation (NFDC) den longjemer Department of Information & Public Relations ajanga ayongzük aser iba sentong ya December 05, 2021 nü tashi agitsü, ta kasa sangdong nung shia lir.

GOVERNMENT OF NAGALAND DIRECTORATE OF SCHOOL EDUCATION NAGALAND: KOHIMA

NO.ED/SCH/PMS-3/2019-20:

Dated Kohima, the, 30th Nov. 2021

PRESS RELEASE

It is hereby informed all the beneficiaries of the **Pre-Matric Scholarship for ST students studying in class IX and X during 2019-20 & 2020-21** who have not received their scholarship due to dormant/inactive bank account/ invalid Aadhaar etc are to rectify their details and submit their documents within 60 days from the date of publication.

Failing to submit their corrected documents within the stipulated time will lead to forfeiture of the scholarship and no further claim will be entertained.

Beneficiaries are informed to check the list of transaction failure at <https://education.nagaland.gov.in/> and can send the corrected documents along with their application ID at tzudir.123@gmail.com

(SHANAVAS C) IAS
Principal Director

Issued by DIPR



Kohima, Luchii/December 03, 2021: Hokolbarnü Sechii Zubza, Kohima nung Sechii Zubza Youth Organization ajanga Department of Horticulture nem bendanga agüja ayongba Flower Festival sentong agiba mapang ketdangsürtem aser tangartem külemi tangokba noksa ka yangi angur. Iba sentong nung Director of Horticulture, Nagaland, Dr. R. Elithung Lotha-i o jembu aser Tiayanger, SDO (C) Sechii Zubza-i tayongzükba o jembia liasü. Village Council Sechii Zubza, Chairman, Khriengulie Kuotsu-i salem lemsatep. Iba sentong nung SZYO vice president Kevirhebi Mor menden liasü.

DYRS-i Nagaland Taekwondo team nem tenüngsang agütsü



Kohima, Luchii/December 03, 2021: IG Stadium nung Department of Youth Resources and Sports ketdangsürtem den Indo-Nepal International Taekwondo Championship nung Nagaland Taekwondo team nungi medal angurtem külemi tangokba noksa ka yangi angur.

Kohima, Luchii/December 03, 2021 (TYO): Tawa, New Delhi nung November 27 aser 28, 2021 anogo ayongba 'Indo-Nepal International Taekwondo Championship' nung takok angur Nagaland Taekwondo team nungi asayartem nem Department of Youth Resources & Sports-i tenüngsang agütsüogo. Hokolbar nikongdang Indira Gandhi Stadium, Kohima nung team atema Department of Youth Resources & Sports ajanga sentong ka ayongzüka liasü, ta sangdong ajanga metetdaksü. Iba International Championship nung Nagaland Taekwondo team nungi asayar 20 agi shilem agiogo aser iba asayamung nung parnoki Gold medal 9, Silver medal 7 aser Bronze medal 2 densema medal 18 angu. Team coach Visabiu Peseyie, State Taekwondo Coach, DYRS-i asayartem metetpeladaktaüba mapang, Taekwondo Sports academy

nungi tebur 20 agi pewee, sub-junior, cadet, junior, senior indang category balala nung shilem agiogo, ta ashi. Iba International Championship nung team-i medal 18 tashi takok angu aser shilem agir team 38 rongnung Nagaland team-i gold medal timba ngua record yangluogo. State nem tenüng tajung bener arutsüba asoshi, DYRS Secretary Wezope Kenye-i, asayar nem tenüngsang agütsü. State nungi Olympic nung shilem agitsüpur adokdaksütsü asoshi Department-i tajungba inyaktsü merangdar. Saisapongeri iba mangdang atalokdaksütsü asoshi inyaktsüla aser dept.-i parnok dak teimla lir. Ajasünungang, State atema iba temoatsü aser tajangzüik asütsü akok, ta pai ashi. Taküm nung takok angutsü asoshi Tsüngremi moatsüba/agütsüba sempettem bendanga agüja aser tim nung amshitsüla ta pai saisapongertem ajungshia liasü.

"Tsüngremi agütsüba temoatsütem shitak nung amshiang," ta pai ashi aser tangara temoatsü angutsüsa pei taküm asüngtetta aliba ajanga tatishitsü tajung sayutsüla, ta pai ashi. DYRS Director, Akumla Chuba-ia Nagaland Taekwondo team nem tenüngsang agütsüba mapang, "nenoki (asayartem) bendanga agüja aser meranga inyakba ajanga takok tulu nguogo aser tarutsü nunga State nem tenüng tajung bener arutsü asoshi maneni meranga inyaktsü imlar," ta ashi. Maneni, iba sentong nung department ketdangsürtem den coach tem aser training agirtem denogo. Iba Championship nung coach Visabiu Peseyie, State Taekwondo Coach, Department of Youth Resources & Sports aser Team Manager ama Keneingulie Khezhe nungeri anir Nagaland Taekwondo team-i shilem agia liasü, ta kasa sangdong nung shia lir.

Ungma yim dak 5th Albatross 7-men soccer tournament asayar



Artic Enterprises Proprietor, Toshi Longkumer-i 5th Albatross 7-men soccer tournament Senayangba GHSS ground nung tenzüksür külen, mezüng match asayatsüpur den tayongertem külemi tangokba noksa nung angur. Mokokchung, 3rd December, 2021.

Mokokchung, 3rd Dec (TYO): Albatross Football Club Ungma-i ayongzüka 5 buba Albatross 7-men soccer tournament Dec 3 nü Artic Enterprises Proprietor, Toshi Longkumer-i Senayangba Govt. Hr. Sec. School ground nung meraketa tenzüksüogo. Taküm iba asayamung nung

telok 21-i shilem agidar. Asayamung tenzüka mezüng asaya defending champion - Sunday People o Lucas FC na asayaba Sunday People-i goal 4 agi akok. Iba asayamung shir teloki bendir takoker nem 30,000/- aser tanabuba jenjang nem 15,000/- agütsütsü. Iba den nija senpet - Best Goalkeeper, Highest

Scorer aser Player of the tournament nungertem shimtsü, ta tayonger ajanga sangdongogo. Iba asayamung mapang HIV/AIDS dak sentakba nung temetetsü osang tapu balala banner, pamphlet aser official T-Shirt amala nung red ribbon inokba ajanga sangoktsüdaki, ta tayongertemisa metetdaksü.

BWF World Tour Finals: Sindhu-i Chochuwong makok

Bali, Luchii/December 03, 2021 (Agencies): Hokolbarnü, BWF World Tour Finals asayamung tetsür kija asaya nung, anaben Olympic medal angur PV Sindhu-i tasembuba aser final Group A game makok. Mangupura Hall - 1 nung Sindhu aser Thailand tsür Pornpawee Chochuwong na asaya liasü. Iba asaya nung Chochuwong-i world champion Sindhu madak 21-12, 19-21, 21-14 agi takok angu. Iba asaya ghonda 1 ser minute 11 nung tembang. Chochuwong-i takok anguba den Group A nung lai temaba jenjang tongtetogo. Knockout atema Sindhu den Chochuwong qualify süogo. Mezüng set nung Chochuwong 11-6 agi Sindhu tejakdang kümadok aser Sindhu nem point aika magütsü lai 21-12 agi iba game koktet. Tanabuba game nung Sindhu-i Chochuwong ajateta asayatsü maongka angu aser point 11-6 agi la tejakdang aküm. Ajisüaka top-seed Chochuwong-i Sindhu den toktepa asaya aser tena tsüngda 19-19 kümadok. Game

tasembuba asayatsüsa, Sindhu-i ano point ana atonga ngua 21-19 agi game tanabuba koktet. Decider nung Sindhu-i junga asaya tenzüik, saka Chochuwong-ia la den kanga toktepa asaya. Tena tsüngda 5-6 aliba mapang, break atongtsü lia Chochuwong-i kanga dang kara Sindhu ajatetta 11-7 aküm. Break sülen Chochuwong-i ayong ayonga dang iba game takok angu. Honibarnü Sindhu-i Akane Yamaguchi den semi final asayatsü. Ano külem India nunger Lakshya Sen-i Viktor Axelsen den semifinal asayatsü terenemba lir. Kasa asayamung tebur kija asaya nung, India nunger Kidambi Srikanth-i round tasembuba aser final Group B game makok. Iba asaya nung Lee Zii Jia-i Srikanth madak 21-19, 21-14 agi takok angu. BWF World Tour Finals - tetsür tarep nung, India tsür Ashwini Ponnappa aser N Sikki Reddy nati Britain tsür Chloe Birch aser Lauren Smith madak takok ngua tembangogo.

Longleng nung Inter-Departmental tournament tembangogo

Longleng, Luchii/December 03, 2021 (TYO): Officers Club Longleng-i November 29 nungi December 01, 2021 tashi ayongba mezüng Inter-Departmental Tournament tembangogo. Multipurpose Building, Longleng nung iba asayamung shibangba sentong agia liasü, ta sangdong ajanga metetdaksü. Iba asayamung shibangba sentong nung alakteta tejaoker ama Phakmei, Youth Secretary, PBCA dena liasü. Badminton men's double category nung Medical Department-i takok angu. Medical Department-i District Administration tsükdaksü. Kasa asayamung women's double nung Govt. High Secondary

School nungi officer temi 1st aser 2nd position nung takok angu. Carrom tetoktepa nung, DEF-i mezüngbuba jenjang nung takok angu aser Soil & Water Conservation Department-i runner-up angu. Iba Officers Meet shibangba sentong nung Longleng district indang Officers aser temulungertem atema Longleng DC aser Longleng SP longjemer chiyongba mapang ka ayongzüka liasü. Department balala tsüngda tesendaktep akangshitsü nükjidong yur Longleng district nung Officer temi iba asayamung nung jangrabangra shilem agiogo, ta kasa sangdong nung shia lir.

Wokha nung 'Airgun' khashishiba tokteptsü

Wokha, Luchii/December 03, 2021 (TYO): Airgun Sporting Association of Nagaland (ASAN)-i December 09, 2021 nü Likya Community Hall, Wokha nung 1buba Open Winter Airgun Shooting competition ayongzüksü terenemba lir, ta sangdong ajanga metetdaksü. Saispong ajanga nüburtem ajangzükdaksütsü nükjidong nung medemer telok kati ASAN ya tentet. Tang ASAN nung district ajunga nungi züngsem 10 lir, ASAN president, Achumo Odyuo-i ashi. Achamo Odyuo-i, iba tetoktepa nung ajaki shilem agitetsü aser shilem agirtemi 'break barrel' aser spring airgun dang amshitetsü. Takok angur nem senpet 20,000/- (Twenty thousand) tanabuba jenjang nung

takok angur nem senpet 15,000/- (fifteen thousand) aser tasembuba nem senpet 7000/- (Seven thousand) den consolation prize tenet agütsütsü renema lir, ta ashi. Naga nungeri shikartsü (hunting) jangrar asünung, ozü aser shiruru dak akhatsü melen saispong ka ama asenoki prangbong amshiba/akhaba sempettem tim nung amshidi, ta pai ashi. Temulung agüja aser nendaka dang asayara, iba asayamung ajanga lanurtemi national aser international level nung shilem agitetsü akok, ta pai shisem. District talisa Kohima aser Dimapur nungi iba tetoktepa nung shilem agitsü terenemba lir, ta pai metetdaksü.

BILEMDANGANG
"Tzünglu arudang anü aputsü yongyabaji tamashi mapa."